

## WILLIAMS, DAVID MATTHEW ('Ieuan Griffiths '; 1900 - 1970), gwyddonydd, dramodydd ac arolygwr ysgolion

**Enw:** David Matthew Williams  
**Ffugenw:** Ieuan Griffiths  
**Dyddiad geni:** 1900  
**Dyddiad marw:** 1970  
**Priod:** Annie Rebecca Williams (née Morris)  
**Rhiant:** Ann Williams (née Griffiths)  
**Rhiant:** John Williams  
**Rhyw:** Gwryw  
**Galwedigaeth:** gwyddonydd, dramodydd ac arolygwr ysgolion  
**Maes gweithgaredd:** Addysg; Llenyddiaeth ac Ysgrifennu; Perfformio; Gwyddoniaeth a Mathemateg  
**Awduron:** Evan David Jones, Mary Auronwy James

Ganwyd 3 Mai 1900 yng Nghellan, Ceredigion, yn fab i John ac Ann (ganwyd Griffiths) Williams, a brawd iau i Griffith John Williams. Aeth o ysgol gynradd Cellan yn 1911 i ysgol uwchradd Tregaron. Yn arholiad y Dystysgrif Uwch yn 1918 cafodd y marciau uchaf o bawb yng Nghymru mewn cemege gan ennill i'r ysgol gydnabyddiaeth arbennig. O Dregaron aeth i Goleg Prifysgol Cymru a graddio'n B.Sc. gydag anrhydedd dosbarth cyntaf mewn cemege yn 1921. Wedi tair blynedd o ymchwil yn Aberystwyth ef yn 1924 oedd y myfyriwr cyntaf ym Mhrifysgol Cymru i ennill Ph.D. Hyd hynny, aelodau staff a gawsai'r radd honno. Bu'n athro cemege yn ysgol ramadeg Glyn Ebwy, 1924-26 cyn dychwelyd yn ddarlithydd yn adran gemege C.P.C., Aberystwyth. Yn 1932 penodwyd ef yn arolygwr o dan y Weinyddiaeth Addysg a bu'n gwasanaethu yn arolygwr ysgolion ym Mynyw, Caerfyrddin ac Abertawe, gyda chyfrifoldeb wedyn dros addysg dechnegol a hyfforddi athrawon dros Gymru gyfan. Trwy ei weledigaeth ef y symblwyd sefydlu yr ysgol Gymraeg gyntaf o dan awdurdod lleol yn Llanelli yn 1947. Meithrinwyd ynddo gariad at lenyddiaeth gan S. M. Powell, yr athro Saesneg yn Nhregaron, a phan oedd yn y coleg ysgrifennodd ddramâu *Lloest y Bwci* a *Ciwrat yn y pair* ar anogaeth R. Idwal M. Jones (*Bywg.*, 477). Wedi hynny ysgrifennodd *Dirgel ffyrdd*, *Awel dro* ac eraill i Gwmni Wythnos Ddrama Abertawe, ac o leiaf un ddrama ar ddeg dan yr enw 'Ieuan Griffiths', gyda *Tarfur' colomennod*, a *Dau dylwyth* yn eu mysg. Ysgrifennodd a chyfansoddi'r miwsig i opereta a berfformiwyd yng Nghasnewydd yn 1934.

Priododd ag Annie Rebecca Morris yng nghapel Dre-wen, Castellnewydd Emlyn, 6 Ebrill 1939 a bu iddynt ferch. Bu farw yn ei gartref, 42 Palace Avenue, Llanelli, 29 Tachwedd 1970.

### Awduron

Evan David Jones, (1903 - 1987)

Dr Mary Auronwy James

### Ffynonellau

*Llanelly Star*, 5 Rhagfyr 1970

*Y Gwrandawr*, Rhagfyr 1970, t. vii

*Mynegai Bywgraffyddol W. W. Price*

### Dolenni Ychwanegol

Wikidata: [Q28360824](#)

**Dyddiad cyhoeddi:** 1997

**Hawffraint Erthygl:** <http://rightsstatements.org/page/InC/1.0/>

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n tudalen codi arian am ragor o wybodaeth.



Arddull APA



Jones, E. D., & James, M. A., (1997). WILLIAMS, DAVID MATTHEW ('Ieuan Griffiths '; 1900 - 1970), gwyddonydd, dramodydd ac arolygwr ysgolion. *Y Bywgraffiadur Cymreig*. Adferwyd 14 Awst 2024, o <https://bywgraffiadur.cymru/article/c4-WILL-MAT-1900>

LGC  
NLW

LLYFRGEL  
THE NATION



Ysgrifeddiadau  
Llywodraeth Cymru  
Copied by  
Welsh Government